

江
西
詩
徵

江西詩徵卷二十

南城曾煥賓谷編集

宋

岳珂

珂字肅之號倦翁相州人忠武後裔南渡後家江
州甘棠湖嘉熙間官戶部侍郎歷寶謨閣直學士
提舉太平興國宮以恩封鄴侯著有玉楮集

後元祐行上喬益公

正月二日天氣清六符兩兩三階平問門催班報麻案珂
馬玎玲萬人看押麻參政拆璽封宣詞舍人來殿東鞠躬
一聲百寮聽軍國平章喬益公天心果與人心同大哉聖

斷天與通本朝太平說元祐五嶽三光渾未剖當年一日
三制頒呂范堂堂分左右度中大老更魁傑申國勲名止
韓富民生是時非漢唐親見至治躋義皇一塵不起四陲
服軌順星躔蕃五穀士皆有造百姓寧官僚徹底清似冰
析楊畢空戈革偃天街鏡淨無機槍彼何人斯階啓厲九
縣回鸞八紘沸高皇匹馬開東南王業中興今五世窮荒
秣鞠何自來中原萬里吹黃埃數殫剝復回否泰胚渾元
氣鍾奇才耆明壽輔軼千古呂望鷹揚稱尚父便教旦奭
居東西穆穆迂衡今再覩官家卽日開天章貂冠玉佩遊
巖廊一都一俞一吁咈四海春風已披拂聖賢自咎難相
逢巨魚縱壑鴻遇風與人觀呼爭前說元祐嘉熙莫分別

君不見徂徠處士歌一蓼濃墨六字慶歷詩生民至今受
其賜千載萬載生光輝

病虎行

長風吹谷白日暗曠野人稀雲黯澹狐狸嘯舞豺狼嗥病
虎安尾行蓬蒿天寒泉凍山骨高皮枯髀痒霜爪搔紛紛
晴雪爬落毛垂頭帖耳身腥臊羣鴉槎牙噪古木燐火半
青新鬼哭走麝過前不能逐目視眈眈蹲撲揪毛風血雨
天地肅何日跳眼看食肉天生萬物有盛時當年一嘯天
助威坐看雲起行引兒當塗寧復論老熊一朝老去守巖
竇落葉滿山冰雪後壯心空在筋力疲寂寞長饑眠白晝
古來豪傑多沈淪不用爲鼠皆若人范睢折脅西入秦內

史長歎田甲嘆可憐百獸爲披靡轉顧不如圈中豕男兒
奮蹄亦渠似肯復虛爲倚崖死君不見南山白額曾報恩
牆頭金枕投何人

午睡

東日平明際北窗高臥時五經方坦腹百慮且伸眉蕉覆
從疑鹿槐安更獵龜覺來還一莞七椀玉川詩

排灣遇風對岸卽彭澤舊縣

隱約山藏霧砢砢地起雷黑風吹海立白雨過江來齊樂
正應耳沛兒安在哉雄雌誰與辨試上楚王臺

上巳約客病不及往口占呈陳元履王因道諸君

我是棠磯舊釣徒天教生與水雲俱蘭亭正值人修禊柳

岸還添浪拍湖幸有丈人觀筆法可無嘉客醉兵厨直須
去躍城東馬更與畱春作後圖

子歸未省松楸將以初秋望前汎湖之龍門已戒舟
而值連雨因賦天問

小心風伯紫宮回眼看銀蟾海上來元豹又成漫谷霧斷
虹猶在隱山雷便教雨積三時害未信雲無一日開待試
平生補天手爲君明鏡再安臺

賀李微之兼工部

奎章夜下九重天雍乘疇咨法從賢紀雉重開五工正止
麟還見一經傳紫河佩袷新簪橐青汁磨鉛舊簡編便合
史筵尊領袖紅雲堆裏望台躔

設醮太平宮竣事呈偕行諸君

星壇仙簾韻瓊瑤彷彿神旂下九霄龍駕清都三境接蜺旌絳節百靈朝霜澄夜氣俱明徹雲澹秋容想沆寥耿耿寸衷天所鑒憂時惟冀五兵銷

己亥明禋覃恩封鄴侯感愧有作

布衣所願極封畱佩印歸來正倦遊汗馬無功開上郡鑄龜有意願中流南巡空負黃圖恨北望還興紫陌愁王國不煩謀主父自嘲支子亦通侯

夢尚畱三橋旅邸

天上歸來打六更夢回搔首正營騰玉霜初上三更月綠猶明九市燈聲微銅魚催勘箭影斜金鵲在觚稜帝鄉

東望重回首佳氣何時到五陵

五年不治筆硯奉詔起家是日始草辭免奏旋假書
吏於郡題寫皆生疎又堂帖趣行三日戒塗偶成

露封膳奏曉鳴鈴當御應闕乙夜呈京兆有裝隨使者陳
畱無酒憶厨兵故營將鉞譚家世老吏公車識姓名塵事
看看到書尺更驚三日有王程

春波堂小飲懷棠湖舊隱

平生到處西湖長眼底波光日日新圖在輞川非舊隱夢
回笠澤是前身一江細雨畝青菊萬里雄風起白蘋獨立
蒼茫動歸興釣磯須理未垂綸

炎暑今年特地奇不妨湖上訪清漪長隄步履誰堪擬高

閣憑欄我總宜喚客黃鸝穿柳度猜人白鳥映荷窺衰翁
病骨難禁熱且倩西風自在吹

與高紫微雪溪餞客雖已豫盟朕坐次子每居上爲
之踧踖寄此見意

碧梧正耐雪溪秋況是西風送客舟華宴雖思奉婪尾麤
官何敢作遨頭達尊諒識詩囊意負約仍輸酒斛籌想見
尊前列紅袖可憐無分聽梁州

望樊口懷陶士行

青年老子恨婆娑未付其如印傳何吳苑關心春日少湘
江回首暮雲多可無司馬親封鑰自是將軍老枕戈我亦
新來了官事正輸一舸弄煙波

太行道

太行羊腸坂九折雲墨風乾尺深雪堇泥道滑木葉寒
轆轤車聲行復歇華山有馬久脫轆轤歸來牧野經幾年一從
倉箱事居積聊以知道煩長鞭前車已覆覆道左天井關
頭夜明火後車趨駕開井陘唱籌仍復催連營關山青草
春二月單軌一冬曾結轍鬚顏毛落雙膊高引領皮穿眼
流血去年搏手雙脊空今年三月甬道同可憐驚力不敢
惜轆轤下亦覺鹽車通君恩天大示弗服兆野已甘偕敲棘
感恩伏櫪飽秣猶爲太行憂後車

長門怨

驚風不成雨行雲去無蹤妾生三十年著籍長門宮宮車

轆轤吞雷曉明星初熒綠雲擾增成丙舍爭迎鑾惟有長
門閉花鳥黃門開玉匙畫史圖蛾眉金鋪振瓊鑰玉秀生
銅池朝陽纔回金屋在轉眄不堪人事改入宮已作鄭襄
噉出塞那知延壽賣花殘鳥語頻長門春復春花鳥易驚
老況復門內人東風動地夜來惡萬翠千紅繞簾幙當熊
自有匪石心何顧班姬秋扇薄長門勿輕怨視此篋中扇
白華兮綠衣自古兮有之

十一月十五日忽苦舌瘍甚不能飲食憊臥一榻戲
成

君不見東坡昔步虎溪月夜聽溪聲廣長舌溪聲不斷流
不枯此段磊落眞丈夫一生吾伊換喑鳴嗟哉三寸子豈

無公子指紳陳禮法枕麴無思矚如蛤辨士說客譚從橫
叱牛惟解供力耕爾來更自作奇痛晝苦吟呻夜妨夢伏
牀啜粥猶滴浪齋肉持將堪底用太倉受禾三百廛大官
烹羊俱鼎羶瀛洲給膳稱學士飽食端居今六年生平元
不負此舌欲辦一奇了無說更憎此舌工負予乃復累我
七尺軀鴟夷榼載鷓鴣杓向口低眉輒前卻齒牙助桀復
搖落誤殺流涎孤快嚼仰天大笑絕冠纓舌兮腹兮誰重
輕

病中未能訪鄧德載督參大監戲贈二首

昨朝華宴想清歡今日牀頭未整冠已恨酒腸孤夜醉更
驚病骨怯春寒多情條脫參差是一抹琵琶錯雜彈老眼

影昏正無緒
爐薌燼冷對蒲團

老來病是惡因緣
白晝明窗思悄
朕欲住又傾連夕雨
半醒似醉困人天
近拈吟筆塵欺視
遠想江樓浪拍船
滿院杏花紅欲放
何時長笛醉風前

春晴將遊玉淵踐吳季謙待制馮可久武博山行之約先走長句

康廬三萬丈下有神龍淵
旁聯玉井並仰溯銀河連層崖
積冰雪斷岸藏風煙崔嵬五老峰
迸瀉三峽泉鯨鯢碎紫霧
蟬蛸開青天脈疑海眼近寒入山骨
堅澗草搖秋暉谷花發春妍
其間地布金到處題標璇大哉象教尊
儼若鰲髯仙巍巍南宗柏湛湛西方蓮
總持包萬法卓犖棲羣賢

慈心鬼神仰顯跡今古傳遠令千聖境容此一席顯我昔
宿命通曾結它生緣嘗聞祖師隱上應帝釋躡清宵珠石
墮白浪星湖邈至今澎湃中常欲光景然當時初卓錫如
昔睨采椽浮雲常抗志立雪思比肩壯懷凌九疊浩氣湧
百川山水爲高深志節爭後先永言縈俗累茲遊經幾年
猶想謝公屐同整劉琨鞭橋梁識昨經歲月驚舊鐫盍簪
有耆碩授館許欸延牛耳盟屢寒馬頭月方圓便思供粢
粢更擬焚蘭茝先尋遺民盟次迹繡佛禪策杖挂錢去拂
石看山眠歸來廬山南三士同陶然

東壩以裏沿岸人家皆對門植葦於小嶼謾成二絕
句

岸旁幾曲住人家淺嶼排門種荻花縱使秋聲常索索斷
無司馬聽琵琶

曲江四畔鎖離宮細柳新蒲日日風想見千門映春綠君
王未見碧成叢

玉唾壺

古來玉唾壺歌罷壺爲缺憂時一片心常惜志士烈鸛鵒
瑩出昆吾刀截肪溫潤如切膏悲歌聲動行雲高何愛一
閨稱世豪馬生驥州北未省能伏檻骨拳髯禿剏四蹄鳳
麟麟汗人不知夕陽芳草顧影嘶猶憶振鬣天山西可憐
歲華暮萬里瑤池路鹽車轆轤踰太行夜然枯草盡服箱
上天振策無王良徒有此志今未忘荆山韞明月良工斷

不徹抱璞昔三川曾泣卞和血阮斷後段不可磨尊前對
酒聽浩歌唾壺雖缺璞更多騏驥不生奈老何

趙山

驅車結束趁晨暾水樂簾前共一尊二十二年如掣電軟
紅依舊暗修門

江南閑殺老尚書自是承平一事無送客折腰書脫腕試
從駝巘看登塗

碧雲亭晚眺

閑步碧雲亭寒郊弄晚晴牛羊分暝色禽鳥有春聲城柳
風猶勁溪梅水共清屋梁正殘照西望憶長庚

歲華方冉冉耕畝自閑閑日落青楓浦雲平白苧山夜賊

嚴警柝昏鼓動層關風露汀洲冷驚鴻自往還

利登

登字履道號碧澗南城人寶慶間避亂梅川旋徙
佛巖又徙空同淳祐元年始舉進士有懽稿

雜興

松柏託茂林高不尋丈至寸喬附太山未長已千里置身
患不高餘事安足擬遊必蓬萊遊棲必崑崙棲仙步必祥
雲仙茹必靈芝鳳凰雖自飢妄食固不回癡爲嚇腐鼠可
笑空自疑

我背此遠遊寒梅吐孤豔重來幾何閒叢青倏以遍誰云
花與葉同樹不相見

郊外

春色到江斷野香涵日嬌鳥穿芳樹語人隔遠山樵

仙塘

一椽自著此山幽蘆葦蕭蕭遶屋頭野老屢來詢姓字社
人相約賽春秋寒山此去無飛燕白水初傳有遠鷗病起
偶朕成獨往冷煙斜照使人愁

沽酒

有錢但沽酒莫買南山田勾引催租人驚散青松煙

春日

雨過苔猶溼風來戶半開閑花忽落盡啼鳥自飛來

晚步

九言集卷二十一
九
住在山塘深更深門前落葉與堦平高人聽鶴來相過野
老因樵熟識名一水欲流山影去斷雲時伴燒痕生脩然
獨步蓮峰夕十里松風秋月明

仙塘茅舍

住在山深處門前數曲灘近邨煙勢闊傍水樹陰寒釣客
輒褰癖高人借鶴看只愁山水怪嫌我著儒冠
門對平蕪闊荒田帶水聲牧童兼鴨養野老叱牛耕山暖
松花重圍春菜子生杖藜斜日裏籬外白雲橫

江亭

江亭凭望久野色暝蒼蒼古木浮寒霧空山入夕陽水流
前夜月風作蚤秋霜卻笑垂綸者因魚亦自忙

梅花吟

落日孤煙寒不度梅花忽見橋西樹疎影猶寒澗外雲暗
香欲薄山前霧寒死不作女兒面幽絕卻懷廊廟具但知
殿後歷年芳誰識僂先啓春路初開豈無仙子來已落尚
恐神明護後來紅紫競春風此已成功鼎鼐去

次琬妹月夕思親之什

緩作行程蚤作歸倚門親語苦相思白頭親老今多病不
似當初別汝時

野農謠

去年陽春二月中守令出郊親勸農紅雲一道擁歸騎邨
邨鏤勝黏春風行行蛇蚓字相續野農不識何時讀唯聞

是年秋粒顆民不收上堂對妻子炊多糴少飢號啾下堂
見官吏稅多輸少喧征求呼官視田更視釜官去掉頭吏
不顧內煎外迫兩無計更以飢軀受笞箠古來坵壠幾多
人此口孱生豈難棄今年二月春重見勸農文我勤自種
穡自苦何用官司勸我氓農亦不必勸文亦不必述但願
官民通有無莫令租吏打門叫呼疾或言州家一年三百
六十日念及我農惟此日

別遊天台雲臥住

半月陪杖履此別情詎忘平生兩知心蹤跡長相望茲遊
天相之檐雨對夜牀旅行得心朋在客如家鄉如何遽此
去泛彼天台航知君愛奇觀赤城有霞光儼達五百尊問

我今行藏詩骨瘦未改雙鬢塵已蒼

至家

明時射策難爲合塵世求名本是浮
整頓書籤還夜課增添酒壺與寒謀
羞逢山友長低面慙把漁竿不到頭
盡日小樓凝遠望白雲黃菊十分秋

永新道中

冉冉螺川路茲行本不期地平風到疾
山僻雪消遲漸遠鄉人少初行岐路疑
斷雲無意緒直欲上梅枝

寶陀清賞夙慕晨遊願不從心因成小詠

寶陀十里路此日想同遊萬古不收雨
四時長是秋樹寒煙半擁山溼露長流
獨我思歸苦無因到上頭

玉臺體

六曲鴛屏紫玉環
寢衣紅地繡雙鸞
相思未必君如一
一夜芙蓉翠露寒

行雲一夢去無蹤
鳳尾羅衾翠漫重
人世幾何禁此別
海棠花下悔相逢

歐陽守道

守道字公權初名巽字迂父吉州人淳祐元年進士官終著作郎江文忠作白鷺洲書院曾致守道爲諸生講說文文山劉須溪皆其門人著有巽齋文集

釣雪歌

上天同雲兮雨雪其霏之子于釣兮在水之湄魚潛于淵兮不可求思泌之洋洋兮可以樂饑

馮去非

去非字可遷號深居都昌人淳祐元年進士幹辦淮東轉運司寶祐四年召爲宗學諭

江上

清秋不可奈先自嬾登樓一雁叫寒水數峰生遠愁乾坤消劍氣江海笑詩流不解人間事眠鷗儘自由

所思

雁自飛飛水自流西風不寄小銀鈎斜陽何處橫孤簾十二闌干一樣愁

金陵鳳凰臺

許大乾坤裏那無一鳳鳴臺歛紅日晚梧拂翠雲生瑣瑣
六朝夢悠悠千古情寒潮如有恨時打石頭城

偶成

春風吹送笑談香玉漏銀燈破夜涼歸去東華聽宮漏杳
花落盡六更長

趙必昂

必昂字次山號雲舍南豐人崇禎子年十七登淳
祐四年進士第杜門二十年不出博極羣書後官
臨江通判撫州守宋末避地寧都奉密詔與吳淦
舉義反正戰不利走汀州之途中踰年卒有雲舍

悅稿

飲酒

窮居無與娛弱子戲我右寧知千載前不是桑榆友今爲
骨肉親結愛豈不厚不知後千載當復如此否且盡人間
事幽遠非所叩

董杞

杞字國材鄱陽人

招遊真觀

溪旁老子宮古松奮蒼鬚修逕煙霏深中巖祠像設巖頭
流雲漫千丈藤蘿結猿猱躍其閒手疑攀日月巖下緩經
行人間諸想滅文楸飛電鏗朱弦浮磬徹此山宇宙初誰

擘坤軸裂六丁曾一戲萬古畱洞穴仙翁昔此樓還丹成
白雪佩環昇倒景遺臺猶岌業菊秋風日佳歸艫雙槩欵
便欲茆三閤於此謝塵劫

西園

何處西園好樓雄說媚川村環春色水樹帶夕陽天客促
雲閒棹漁吹浦外烟且來重燕賞著句剩流傳

用洪憲韻自述

壯志摩雲一劒閒欲屠石堡斬樓蘭功名努力車登坂歲
月驚心水下灘小小茆茨漁子舍星星鬢髮腐儒冠高山
流水無窮思整頓瑤琴試一彈

采清江人淳祐四年進士

秋日過清江傳聘君石溪隱居

有美人如玉招尋故意長
山衣猶芟薜野飯只菰粱
秋入遙空白霜飛一葉黃
年年三徑裏來往有求羊

發興

主靜觀心妙耽奇發興長
蘭邊招翡翠梧下待鸞凰
天地東風綠江湖西日黃
靈修猶浩蕩誰與玩瓊芳

滕王閣

佩玉鳴鑾一笑空至今
華觀疊青穹西山殘雨虹
腰白南浦騎陽鴈背紅
幾度登臨添感慨半生漂
泊老英雄檻前猶是唐時
水曾見王郎泛酒篷

武昌江漢亭憶南軒

亭下雙來綠玉蚪，岷嶓萬里會吳頭。
江穿南北天心過，漢接東西地脈流。
水上龍爭方一夢，山中鵲起已千秋。
張劉精爽知何在，安得同來賦遠遊。

章 粲

粲清江人采弟

秋日懷松溪趙宰經文

晴窗靜繡書，凝塵掩行迹。
花影畫簾閒，苔痕秋徑寂。
憑高招遠風，緣流弄寒碧。
緘情寄天涯，杳杳江閩隔。

湖上游瞞寄家兄

花霧壓晴埃，柳風蕩暄瞞。
錢塘佳麗地，春華大堤曲。
幽禽

粲林白野水明湖綠清賞遠難期懷哉美如玉

春日效韋體

新綠灩晴池涓涓泉脈動東風度花梢春音入禽哢而我
理羣書朋儔罕迎送儻然愜心期此樂誰能共

詠二疏

人生白駒過世態蒼狗變紛紛慕蹈躋寥寥志務卜赫赫
王侯居翕翕富貴戀翠蓋擁游雲朱鞍曜驚電金張財力
豪許史名聲銜滔滔利欲波卓卓見所見長揖萬乘君元
髮謝朝弁行人相歎咨羣公遙祖餞高風振朝野流光照
史傳嗟嗟紳綬士來者宜知勸

章鑑

鑑字公秉寧州人淳祐四年進士累官權參知政
事遷同知樞密院事咸淳中拜右丞相兼樞密院
使元兵逼臨安鑑托故去遣使召還罷相子祠季
年屏居山中有杭山集

送道士歸得日觀

風月詩幾卷江湖屐一雙
斷蛟懷劒石跨鶴叩禪窗
土潤巖生雨林幽寺隔江
歸當訪仙隱相對酒盈缸

杭山

買得漁磯繫釣船
魚龍吹浪駭鷗眠
從來白石清泉地勝
似青山小洞天

張顯

顥字立道德與人與程端蒙董盤澗講程朱之學
淳祐四年進士授武義尉理宗詔舉孝廉畱守建
康以馬光祖薦入史館修三朝實錄有雙澗文集

軍山

亂石如羣羊合沓千里奔軍山屹當前盤踞作虎蹲巨鎮
壓坤維層巔白雲屯下瞰大溪流三尺清不渾舟人落風
帆繫纜前山根我欲摘星斗懸崖那可捫

鍾季玉

季玉樂平人淳祐進士知萬載縣以李廷芝薦累
遷樞密院編修出知建昌軍改江西轉運判官後
改都大提點坑冶北兵渡江徙寓建陽死之

贈南城游海彭元珍二老人詩

八九十翁同勝會一千餘歲集耆英紀庚齊說生乾道留
得餘年見太平

湯漢

漢字伯紀安仁人淳祐四年進士度宗朝刑部侍郎
權工部尚書提舉玉隆宮以端明殿學士致仕
卒謚文清有集

輓謝疊山詩

向老逢危亂投軍復欲東九遷徒有命一戰不成功楚戶
言猶在韓讐事已空風塵長蒼莽身世轉飄蓬
芒屨初就道慷慨不辭雖袞袞長江盡蕭蕭易水寒風霜

欺漢節塵土上南冠無復加餐飯旁人打淚看

懷哉千古事百鍊不爲柔漢祖九封齒殷臣不事周寧隨
文相國直匹李潭州浩蕩江相接東西萬古愁

寄劉後村

唐朝空自貴宏詞科目何嘗得退之掌制徒聞諺子厚殘
篇僅見命敦詩堪嗟寔錄無完傳太息淮西有後碑寄語
莆田紫薇老文章蓋世例如斯

陳宗道

宗道字寧之號九臯南豐人抱才弗偶中壽而歿
弟宗禮嘗作懷臯賦哀之

遊麻姑山

千秋雲氣龍猶在
午夜松聲鶴自寒
仙子偶來成夢事
至今遊客未嘗閒

旅懷

清波渺前灘
白鳥下寒渚
樵斧空山鳴
歸舟夕陽暮
去來風中人
明滅雲外樹
雙輪何時休
愁心此羈旅

送別

江邊出相送
君去我當返
徘徊未忍還
孤帆夕陽遠

洗馬行

玉谿谿頭波綠玉
玉谿谿上沙金粟
曉營出馬五花雲
鳴榔齊首橋南浴
馬高如屋長如龍
四蹄如鐵聲如鐘
青芻幾束粟幾斗
參汝愛汝爭奇功
編驥抹刷解色罷
黑面雄

兒齊上馬就中一馬不敢騎云是將軍臨陳者

送戴石屏歸天台

天台四萬八千丈一根直下寒銀浪青蓮老子夜不眠往
往飛魂到其上詩情不減流白雲千載重見戴叔倫蓮花
峰下赤城洞芒屨翻笑山中入秋風孤篁八九尺老面百
摺頰銅色田文席上摩吟顰鵲立蒼苔烟雨黑我家竹屋
樓龍岡夜搗孤月餐寒霜醉騎白鹿軍峰下一見贈我青
瑤璫南山臺前春正好萬壑千涯清夢曉蒼苔石磴撫闌
干往事飛鴻天亦笑君今東首回牙樯我亦西去凌蒼蒼
截江橋南春水急酒酣不記攀垂楊軍峰江南最高處我
上峰頭望君去歸時定入天台山舉首雲間一相顧

題謝氏西谷

江東風流會稽伯玉壺貯香傾琥珀春風十里東山雲一局寒楸晚空碧盤盤石磴紅泉仙春夢草斷瑤池箋蒙茸曲笠雨花濕老屐踏損蒼苔錢雙鸞翩翩跨元島月白香魂翠山杳玉蘭千載流芳馨清風凌厲連紅曉

送寧都陳令

梅花樓頭立晴雪松葉亭根聽夜雨鼙鼓息響月千山桃李無言春萬樹

陳宗禮

宗禮字立之號千峰南豐人淳祐四年廷對第三人累官參知政事以直言清節著卒贈盱江郡公

諡文定

虞帝廟

南國薰風入帝歌至今遺廟只嵯峨
一天曉色懷明哲四野春光想太和
存古尙瞻虞袞冕撫時幾換禹山河
海濱樂可忘天下解寫靈明是老軻

山行

川原綠已張春去今何在深樹涵幽姿
微雲弄晴態禽聲互酬應林霏間明晦
漸遠人跡稀清音自虛籟

晚出

落日山氣清歸禽噪林杪意行忘遠近
吟袖深烟表漉漉水縈田幽幽雲返嶠
忽聞鄰寺鐘沿途發長嘯

紫霄觀

平陂復峻坂曲折勞攀躋中道忽孤絕恍然遇安期授以
度世術呼吸隨風飛長跪受隱文三復歎且疑變化豈不
神勾譎莫予期回鞭指故山從此問所歸

蔡志學

志學字及之自號如心居士新昌人淳祐七年進
士初調興國簿憲使李迪愛其才檄入僉幕歷知
高郵州終朝奉郎有如心集

高郵秩滿舟經小孤山阻風作詩投江

平生事可對人說囊無一文關節錢寄語江神好看客願
分風力送歸船

汪立信

立信字誠甫號業源浮梁人徙六安淳祐七年進士歷官端明殿學士江淮招討使元兵至建康扼吭死之贈少傅

金陵懷古

勝地尙存龍虎氣荒臺已失鳳皇蹤六朝文物山川古霸畧終歸指顧中

葉隆禮

隆禮號漁林德興人淳祐七年進士官建康府西廳通判改國子監簿按宋詩紀事作嘉興人茲據通志采入蓋德興人遷嘉興者

烟雨樓和朱南傑韻

誰家亭館占湖東，寂寞爲隣祇陸公。
竹樹一隄如有礙，乾坤萬象自無窮。
櫂歌遠入秋波綠，塔影中分晚照紅。
尊酒待遊烟雨候，畫圖著我笠簑翁。

馬廷鸞

廷鸞字翔仲，號碧梧。樂平人。淳祐七年進士，與賈似道同朝，未嘗稍涉比附。咸淳中拜右丞相，以觀文殿大學士提舉洞霄宮，後罷相歸。又十七年卒。有碧梧玩芳集。

館中送鄭著作

士爲慾心縛，蝸牛粘壁枯榮華。不盈晷眇責彌八區，不有

君子人中流誰一壺公懷天台秋風昔廊廟須南宮接東
觀並轡轡天衢幽憂腸內熱慷慨涕縷濡拜疏上虛皇誦
言折姦愚肝膽非已物宇宙須人扶恭惟天王聖肯使善
類孤一朝擁麾蓋自詭歌袴襦黥歛股肱郡新安文物都
斯文紫陽翁千載長昭蘇稻苗新進士倚公爲播敷蘭絲
困窮民願公薦薦于勉哉崇明德歸來誦唐虞

用大東萊臨川詩韻示諸兒

惠子五車書彼富吾何嫌滔滔歲崢嶸濯濯木荏苒前榮
恒虛誇新儒就退斂東鄰有碩師簞篋孰云遠斯文豈終
窮小子宜黽勉寒燠炷老膏此興復不淺

次韻周公謹見寄

十年思美人淵淪抑天飛辛勤種青門竟作抱蔓歸日月
老賓送霜露沾人衣沾衣何足云八表籠烟霏

空山學仙子滿耳笙簫聽誰知九天上雲霧本不局度世
同御風蓬蓬隨飄零又如芬陀花出火而青青

涪翁雪堂仙分韻故不疎投之孤芳篇托根豈云虛報以
蟠桃實一嘗千載餘洗髓躡閭苑游於物之初

射洪高蹈翁哀歌淚盈盈幽居觀元化悼此歲月更感遇
三十篇讀之慨余情白露號元蟬春日鳴倉庚

退之懷桂林藥物珍陸離物情惡衰歇義心感親知我生
久一死不死當語誰與我制頽齡悠悠白雲期

題王氏琴清堂

孤桐缺月風露秋夜蟲催織寒颼颼拂牀文字飛葉葉古
心埋沒從何求客來洗予箏笛耳清圓瓊然散百憂南窗
無絃鼓愈淡焦尾有桐葉不收卓哉奇士千載去已矣奇
情萬古休江左諸王孫子儔琴清之堂遺風流飛泉爽籟
十二操鏗鏘浮玉鳴天球文王宣父次第作此身還見大
雅不收拾書囊雜釣具伴君携琴隱林邱作詩一爲寫奇
趣此生此興長悠悠

次韻謝潔齋惠春膏紙

霜毫秃盡千枝竹銅雀臺荒死潘谷哀哉四寶併成空猶
有老崖籐搗玉青錢學士將相科黑頭刺史朱丹轂懷銀
早去鎮湖湘揆藻端如起巴蜀天平歲晚楸斯文往往長

吟書短幅雲昏雨暗白龍牋林密山深紫芝曲鳳樓誰助
斧斤脩魚網不禁塵土辱我馳家畔楮先生越薄吳腴此
粗俗鏗金戛玉新有聲縫霧裁雲豈堪錄向來交友文字
間矢往湍奔如撒菽薄材那敢派江西一寸詩腸愁萬斛
謝吳直卿惠嘉樹篇

槐底婆娑生意盡柳邊搖落長年悲殷東陽守徒嗟惜桓
大將軍自涕洟不知庾叟江潭賦何似延陵季子詩

次李改卿韻

麗句費敲推清吟出競病日長簡編叢春老蓬蒿徑志士
苦憂時高人思繕性山房讀道書晚花紅豔靜

十月二十六日甲子

乘雲傷往歲甲子又今晨莫唱貞元曲誰爲寶慶人早霜
明帶月寒菊豔爭春敢睨昭陵栢搗呵有鬼神

贈汪泰軒

咸淳辛未汪君對大廷一日羽服訪余固以警余
林下之思矣君輸忠萬言有司報聞余以漕幕縻
之君不可曰吾且扁舟歸謁子陵無媿色足矣此
其視聲利爲何如詩以贈之

萬言朝鳳闕一笑落漁舟把我慈珩解從公欸段游東來
迎羽服西去羨羊裘揮手謝漢使蒲輪公所羞

程楚翁訪考亭舊居著閩山集爲題其後

有客傳吟藁知渠來自閩四書猶在魯六籍不憂秦太史

江表書後 卷二十一 三
經鄒嶧離騷感楚臣誰知夢奠日曾憶後庚申

次韻潔堂五日

故國天中節吾儕日暮年愁心萑歎苦悲緒絲絲牽疊雪
虛唐賜薰風絕舜絃窮山飢越菓醉摘尚凄然

贈程楚翁

汗竹丹鉛側空花粉黛中尚懷丞相亮肯署大夫雄有客
來今雨誇予邁古風幽情傾不竭渺渺碧雲東

恭進明堂大禮慶成詩

并序

臣恭聞孝宗皇帝淳熙六年宗祀明堂積雨頓霽
詞臣周必大上言曰謂天難諶乃爾易見謂天益
高乃爾易回蓋不特執圭幣陳犧牲而景貺固已

駢臻矣書之簡策至今以爲美談臣惟皇帝陛下
寅畏寶命嚴恭帝祖乃卜中辛稱職元祀宮中齋
戒禱晴先夕陰雨如晦詰旦羣臣奏請宿齋陰靈
洞開天日清宴迄于竣事景氣融明都人衆觀萬
口嗟異格天盛德同符孝宗臣以疎庸蒙恩兼掌
內外制齋宿之夕伏奉宣諭以肆赦之文臣正當
日必有擬述俾臣繳進願惟書生庸陋何以蒙被
聖知如此臣於先儒無能爲役輒循故事撰列明
堂大禮慶成詩五言二十四韻繕寫上進唐人韓
愈所謂辭語淺薄不足以自效然而指事實錄則
庶幾焉冒瀆宸嚴伏候誅戮臣無任感激詩曰

鉅典崇邦祀精禋展國陽泰元神授英癸卯日宣光藝祖
郊天始高皇受命長後庚基再造先甲迓殊祥率育歌時
夏儀刑詠我將天街澄析木農扈慶金穰築塞懲獯鬻梯
山謝越裳宗祈嚴美報親享薦嘉嘗周士咸奔走堯民共
頌揚青冥收夕雨華耀炳朝陽月御金波穆星流珠帳黃
九重紛羽衛十二駕龍驤鈞玉琳琅展軒朱磬管鏘時行
肅天步安坐集神鵠聖孝昭初課元良儼貳觴旗常森炯
娜黼黻罷周張柴燄千靈墮蘭膏百末香金雞初日麗丹
鳳德風翔薄海乾施博垂雲解澤滂批周仍跼晉蹴漢亦
超唐臣賤來蓬戶君仁點玉堂恩書容藁進嘉頌媿辭荒
有道帝能享難謚聖政康畏威勤夙夜萬壽祝君王

久雨遣餉王新班

舍南舍北水漫漫乍霽仍陰暖復寒石補色天原有漏泥
汚后土不曾乾龍蛇起陸生光怪鸞鳳翀霄怯羽翰聊復
盤飧餉桑戶可能藜杖過蘇端

十月望日泛舟鵝塘感坡翁後赤壁賦有作

浮浮短艇水風微一枕清溪遶曲崎篷底鎔金斜日碎天
邊散綺暮霞飛霜凝水落黃泥坂月小山高赤壁磯等是
初冬一風景感今懷昔自獻猷

游荷溪西禪寺

髣髴招提寄遠村緇郎草草佛燈昏水將綠遶縈如帶山
送青來列在門句裏風騷耆舊遠胷中邱壑典刑存滿懷

孤憤幾株石欲起當年兩達尊

五月二十夜紀夢

生來不作浮名計老去翻驚幽夢奇
宮黍不知哀九廟廷
麻猶聽拜三師
睡昏擬草榻前疏
寤辟疑催牖下期更把
在前榮路看癡翁說夢儘添癡

與三兒涉穰田渡車中讀朱忠靖中興事實有感

騷情長愛重陽近客路歸遲夕照西
舉目山河秋寂寂滿
城風雨晚淒淒
老思舊隱盟鷗社
寒涉深流信馬蹄
憑軾
試看炎紹錄空嗟語石與天齊

十月二十日感舊

九衢燈火鬧嘈嘈斗柄低昂列宿高
漏箭聲沉金鎖徹紗

龍影避貴官豪烏號望帝窮霄壤魚爛遺民沸海濤三百
五年風雪夕孤臣白首臥林臯

次張龍山韻反騷

雪栢霜松自有神衝風槁葉故難禁雲間已閱貞元曲歲
晚誰聞正始音天地有窮歸幻化聖賢無命亦山林愁來
又把離騷讀長夜悠悠慷慨吟

宿杞瞻夜賦

呶軋盤輿度曉岑撫今懷昔淚淋漓蓼莪我老去仍追誦常
棣新來又廢吟有恨臺瓜隨蔓盡無情澗藻與波沉僧窗
月苦夜無寐莫詠兒寒動母心

山中對紫薇花書感

輕盈插向膽瓶中看到山林禁藥同閣下天葩秋月黯樓
頭奎畫曉雲空高攀玉樹扶斑白靜掃蒼苔拾墮紅三十
年前天上夢老來無淚洒西風

感二李

渡海歸來一炷香八齋早欲臥僧房平泉免向崖州死博
得生前萬口羊

紀夢

陽至前一夕夢亡友康至甫遺余墨本晦翁像圖
列三辰五星其上翁盤礴巨石若坐若行旁題一
詩慨然有掃清宇宙之志而不能記其辭覺而有
作

白日青天一鉅儒
清宵入夢忽蘧蘧
覺來猛省戊申疏
曾說中原亂易除

感時寄鍾信甫

予陵灘下立多時
鷗鷺悠悠自識機
春事都來無半月
一聲鴉鵲勸人歸

甲子初冬宿直玉堂
淒風小雨次日卽承先帝晏駕
之變距今二十年矣
大忌前一日孤臣獨眠山庵景
象正似當年挑燈危坐聞田家
鼓笛之聲淒其有感
二首

無限都人哭鼎龍
年多澤久似仁宗
愁來一樣黃昏雨
天上人間自不同

雲黯天低結暝陰孤燈對影夜沉沉可憐一曲村田樂猶是堯民擊壤音

程瑞

瑞字希鳳號梧岡饒州人幼與同郡馬廷鸞友善隱居不仕士論高之

詠梅

清淺溪橋水高低籬外枝這些風骨異瘦盡古今詩

曾淵子

淵子字廣微南豐人宰六世孫淳祐十年進士累官右正言監察御史權戶部尚書浙西制置使拜同樞密院事罷知雷州端宗在硃州自雷來覲拜

參知政事廣西宣諭使元兵至走安南卒

九日登翰苑臺

翰苑臺邊拂舊題歲華荏苒壯心違看萸喜得親猶健對菊猶慚令未歸秋水一江鷗共瘦雲山千里雁初飛宦情有暇無風雨把酒相酬此會稀

漳南示義軍寄邑人譚野臣

漳州城南烟霧深漳州城北氛氣侵憶從奸邪賣和議漢廷君臣愁至今乘輿播遷天地怒殘軍掩泣眠星霧黃金無收白骨多指點枯骸擬親故昨夜羽書如電飛報道三城又被聞皇家恩深重如山英雄奮起披鐵衣萬人同心猛如虎關山震動撾鼙鼓百戰須當百勝歸凱歌唱滿中

原土論功賞爵將憲章汾陽異姓封侯王鞠躬盡瘁固常
事願教一湧殲豺豕莫上高樓偶長望壯懷忽忽思鄉丈
琴臺落日私語時丹心耿耿今能忘惜君忠義老無官山
河破裂泪欲乾衰容未盡麒麟閣目盡故園心轉酸

客安南見進奉使回口占

安南莫道是天涯歲歲人從薊北回江北江南親故滿三
年不寄一書來

蕭立之

一作立又
作立等

立之字斯立寧都人淳祐十年進士知南城縣歷
南昌推官辰州判遭世亂歸隱蕭田有永崖集

桃源

桃源花發幾番春
聞說漁郎此問津
秦帝漫勞方士遣
神仙已是避秦人

杜鵑

思歸言語苦悲辛
啼老江南綠樹春
莫倚巴西君故土
巴西風景近愁人

秋日

野店聊爲一枕謀
五更歸夢入鄉愁
溪流清淺春鉏罷
籬落荒涼絡緯秋

落梅

玉龍戰退鹿胎乾
好在晴沙野水看
舞翠夢回仙袂遠
射鵰人去露崖寒
連環骨冷香猶暖
如意痕輕補未完
誰在

高樓吹笛處輕衫當戶獨凭闌

秋胡婦歌

并序

秋胡婦事見傳記顏延年作詩高之夫卻行道者之金信其絜矣然憤其夫之說桑婦而卒以是死焉推此意也無亦類世所謂妒婦者耶

君家作婦五日強錦衾未煥死鴛牀阿郎遽作遠游別五載菽水空襦裳采桑忽忽春風陌郎歸相逢不相識採蘂贈妾雙黃金妾心如水介如石阿郎歸來坐堂前低頭相視默不言郎心如此不易保醜君一死滄波寒稜稜峻節秋霜句斷倚風流嘆千古後來一種可憐人却遣江津名妒婦

曾如驍

如驍字德稱泰和人淳祐十年進士官寶慶通判
值長沙失守投濱江死景炎元年贈敷文閣待制
諡忠愍

題考功印紙

謹將節義二字結果印紙一宗了却神遊何處澄江明月
清風

周應合

應合字彌厚號洪厓處士又號溪園先生武寧人
淳祐十年進士爲實錄院修撰景定間奉勅撰建
康志拜御史劾賈似道謫饒州復擢直賢院學士

未赴而卒有洪厓溪園二集

望江樓

潞江如練正高秋一笛吹秋上此樓有客乘風來縱酒長歌遠送下灘舟

陳

杰一作傑

杰字壽夫分寧人淳祐十年進士制置司屬官與

謝盤山相善有白堂存稿

按隱居通議作陳杰字壽父號白堂豐城人名

字鄉貫並異然杰傑夫父同義而自堂之號與集名正合當卽一人也今據四庫書校正

望廬山

去年山中行未了廬山意今年江上望始盡廬山勢只道山中行未識廬山面那知江上望已失廬山願人生出處

前料難向來窗下有此山一行作吏事便廢十年讀書早
已悔五老招人笑舉頭三老催船不自由柔艣一聲天似
水無情飛起兩沙鷗

大閘撥醅子園亭坐上文武各半恰西師捷至用同
官韻

花氣深迷院湖光曲抱城殘春烽火暇細雨笑談倚昇甕
看浮蟻飛書報斬鯨漁陽迴席處半著魯諸生

江亭小憩

遠樹依山瘦空江抱郭斜水雲涵雁影晴雪落梅花經歲
長爲客方春最憶家又持五字律草草荅年華

宜檄隨府初程得句

汭楚三千里離淮第一程海潮隨意送江月打頭迎西事
端無恙東風故有情篙師渾未解掛席亦歡聲

重宿城頭驛

天地秋聲早山河夜色深市荒餘冷銚村迴落孤砧紙帳
三生夢蒲團萬古心漫漫獨無旦微步數看參

斗牛山登高

佳節一消憂攜壺上斗牛乾坤有今日江漢自東流亂後
不多菊看來無限秋憑高未能已更爲夕陽畱

景陵湖中宿八村

孤撐出叢葦小泊得疎林南岸桑麻地一川楊柳陰鷺拳
沙磧遠人語竹籬深惟有波間月照予行役心

初出大江移泊別浦

水宿乍移浦客程初望鄉江涵鷗夢闊天入雁愁長漢月
關山白淮雲草樹蒼東遊何限意搔首聽鳴榔

仲宣樓

地大中原接天低七澤浮山川原用武離亂一登樓平遠
難爲盡高寒易得秋無言雙野鷺相對抱清愁

寓舍瓊花一株盛開

疑是瑤林種分從后土家暫來爲地主相伴在天涯勝日
更携酒明年誰看花此生均一寄杜曲有桑麻

送程楚翁歸歙用其韻

木落見江空星迴屬紀窮畏途兵雜盜急景雪兼風問學

嗟遊子論交愧老翁歸來富千古此意幾人同

寄贈

客裏蕭蕭兩鬢秋此身何止二宜休
體文疎似稻中散疾病多於沈隱侯
愧我空餐有懸特看君迎刃解全牛
夜來一炬平安火臘喜先寬主食憂

予以甲寅冬過弋陽石橋戊辰正月重過

周行淮漢萬山川重此經過十五年
野老眉間新世事蹇驢背上舊吟鞭
幾分春色梅花後一片歸心杜宇前
深谷有人難問信石橋倚遍晚晴天

見邸報

正待朝陽聽鳳鳴忽傳鵜鴂作秋聲
百年事會紛成毀一

日光陰屢晦明張霸安能識時務翟公久自見交情人聞
快意真難得茅屋看山了此生

寒夢

寒夢初回斗帳深清輝忽破小窗陰若爲推上松蘿月疑
盡梅花一寸心

咏涂璋家屏風上題宣和壬寅季夏

下芝隨手燕堂空翠幃宸遊黍滿宮一片宣和殘歲月百
年田舍古屏風

題宣和御畫蘆禽

蘆邊晚吹冷颼颼背立孤禽有許愁可是殿庭無事筆已
含原野十分秋

鄧德遇

德遇號清湖新建人淳祐十年進士知靖江軍元
兵入廣城破自沈於清流江

題袍詩

宋室忠臣鄧氏孝子不願偷生自甘溺死屈平公子是吾
伴侶滔滔汨羅是吾處所

余季芳

季芳字子初號桃谷德興人事母至孝淳祐間進
士登第後陳請歸養特授九江府司法有桃谷詩
藁

平園

柳暗花明自一春青山繚繞水如縹偶然覓得桃源路便
欲分棲竹屋陰清晝平原尊小隱夕陽歸路入閒吟遲遲
風袂烟堤上遙望環溪鴨綠深

余芑舒

芑舒號息齋德興人季芳子潛心程朱之學與饒
雙峰友善

天門山

誰將嘉號標奇觀山鳥山花第一重天囑常時瞻北極縣
圖此處數西峰景雲百戰猶遺址當日諸公幾瘦筇定有
英靈來訪舊夜聞嘶馬曉無蹤

歲寒山

爲周冕隱處

歲寒老石尙干霄松柏摧殘只艾蕭岫嘯字昏烟漠漠空
同人去夜寥寥涼蟬高挂千尋壁斷澗閒浮五石瓢不信
渠儂呼不醒倘逢歸鶴試招邀

余萼舒

萼舒德興人與兄芑舒以理學齊名授集慶學錄
學者宗之有武陵遺藁

楊梅

摘來鶴頂珠猶濕點出龍睛淚未乾若使太真知此味荔
支應不到長安

余瀚

瀚餘干人

自題歲寒堂

書堂高構歲寒巔水秀山明隔市廛兩岸柳風吹道骨一
溪梧月浸心天

僥炎

炎號竹坡餘千人魯父

示兒魯

匡居終日只欽欽一寸靈臺萬古心鹿洞象山前路在頻
思寡過到而今

饒魯

魯字伯輿一字仲元號雙峰餘千人從黃幹李春
授朱子之學累薦召不起卒門人私諡曰文元有

集

石潭急峽

兩山夾石湍風急勢吼春雷鬼神泣行人登舟不敢渡疑
有毒龍深處螯嶮巖彷彿若雪川又如三峽傾潺湲水竅
恐是神禹鑿石骨未遇秦皇鞭飛流濺沫弄寒玉赴壑奔
灘勢何速直須流入鏡湖心如遇平夸舟免覆垂楊覆陰
沙岸高將軍喚渡多英豪中流擊楫思祖逖當清宇宙無
辭勞

重湖夜月

昔聞放翁歌鏡湖船尾有酒船頭書又聞鑑湖賜賀老剡
川一曲春風好番陽之東有重湖風光與此真不殊澄波

湛湛秋瑩潔碧月一片沈冰壺彩舟蕩樣搖畫槳上下天
光映虛幌踏歌挹鼓樂者誰武陵樵客來湖上賦詩橫槩
何英雄氣槩或誇前兩翁我思此景勞夢寐東望咄咄徒
書空

稠山茅屋

亂山堆翠如削玉中有幽人結茅屋柴扉寂寂掩蒼苔書
院蕭蕭倚修竹閒雲滿壑白日長吟唔朝暮聲琅琅芸窗
紙破漏月影石硯水滿涵天光風塵頻動遍邱壑此處怡
然有真樂門靜應無俗客過茅深不怕秋風惡高人有才
濟當路曾見徵賢曰三顧愧我飄蓬石洞人茅屋青山在
何處

遠浦棹歌

片帆雨霽飛烟江漁翁停棹歌滄浪一聲欸乃山水綠浪
中驚起雙鴛鴦雙鴛鴦情一何美同宿同飛在秋水不似
人生苦別離女嫁征夫男戰死五湖烟景方紛爭聞歌頓
欲思昇平鄰舟短笛應風響落日淡淡波冥冥美人春詞
誇艷麗皓齒朱唇楚腰細江樓富貴今如何不似滄浪真
趣味

春水番湖

春湖浩浩無津涯銀河之水天上來波瀾萬頃清復濁日
光雲影相昭回雄吞宇宙何寥廓欲度冥鴻勢還卻南通
海氣北長江月出東兮口西落當時神禹別九州彭蠡之

澤居上流千年人物餘潤澤況乃雄秀光潛虬洪濤如山
駕樓榜春風夜夜喧
鼓誰是江湖歸去人扁舟范蠡隨
漁父

琵琶洲

潯陽江上譜無傳化作沙汀越水邊一段遺音人不識夜
深幽咽下灘泉

江西詩徵卷二十